



Bentiaraq Ottosen  
Atassut

UKA 2023/114  
26. oktober 2023

**Motorcykelinik ilumut eqqussisoqarsinnaangussanersoq oqallisissiatut siunnersuut.**  
(Inatsisartunut Ilaasortaq Bjørk Lange Olsen, Demokraatit)

Kiffaangissuseq nammineq inummiippoq. Kiffaangissuseq tassaavoq pituttorsimanani inissisimaffeqarneq. Ajornanngittaqaarlu kiffaangissuseq atortillugu inatsisunik neqitalersuinialeraangatta. Taamaattorli isumaqarpunga aqqusinertigut angallanneq kiffaangissuseqarfissaangitsoq, akisussaasusermilli imaqartussaasoq isumaqarfigigakku.

Nammineerlunga kiffaangissuseq attattuarpara, aamma inuuninni kiffaangissuseqaannavinnissara kisiat toqqarpara. Kiffaangissusermik nuannaartuugama. Kisiannilu saniatigut akisussaaffimmik tiguserusuttuuvunga, kalaaleqatikka siulersorumallugit, kalaaleqatikka siunnersorumallugit. Tassa taanna soqutigisama annersaat.

Pingaarnertut aqqusinertigut angallanneq toqqammaviusumik avatangiisitta allaanerungaarneranik aaliangersagaavoq, taamatullu motorcykelinik nunatsinni eqqussisoqarsinnaanginneranik pissutaasoq oqaatigisinnaavara. Soorunalimi avatangiiserput sanillersuutissagutsigu Qallunaat Nunaanut allaaneroqaaq, taamaattumik uani oqallisigineqartoq eqqarsaatigalugu soorunami oqalliseqataanissaq pingaartutut isigaara.

Motorcykelinik aqqusinertigut angallanneq nunatsinni eqqunneqarnissaa eqqarsaatigalugu killiliisorujussuusinnaavoq, pissutigalugu ullumikkut aqqusinitsigut angallanneq assersuutigalugu sukkassuseq scooterinik, firehjulinik 30km/t-iminik killiliussaq atuutinneqarmat. Taamaattumik isumaqarpunga killiliussaq qaangerneqarpat inatsimmik unioqqutitsineq aammalu unioqqutitseqattaarnerit annertusisinnaassasut. 1970-ikkunni pissutsit aallaavigineqassappata tulluurtu-sorinangilaq taamatullu aaliangersaasimaneq isumatusaarnerusoq isumaqarluta.

Aqqusinertigut angallannermi inatsit nunatsinni atuuttoq naappertuuppoq avatangiiserisatsinnut, pissutigaa avatangiiseq allarluinnaammat. Ukiukkut sila nillertaqaaq, aasakkut sila kiattaqaaq ukiorlu kaajallallugu ingerlasinnaasuuppat isumaqarpunga isumatusaartuussasoq, kisiannili killeqartorujussuusaq. Tassami uniffigigatsigu 30 km/t kisimi sukkassuseq atorineqartussaammat, qaavatigullu pinngortitamut avatangiisinullu mingutsitineq annertussalluni. Motorcykelinullu akitsuut qaffasingaatsiassasoq ilimagigatsi, ukioq affaannaq imaluunniit qaammatit sisamaannaat kisimi

aqqusinitsigut angallassinnaassappata inummut kimulluuniit akilersinnaangitsoq oqaatigisinnaagatsigu.

Ilisimasatsit UKA2011/89 inatsisartunut ilaasortat Atassummeersut **Motorcykeliliniq eqquseqquseqqusaanginnerup atorunnaarsinneqarnissaanut naalakkersuisut sulissuteqarnissaanut inatsisartut aalajangiiffigisassaattut siunnersuut.**

Siunnersuuteqartut siunnerfigisimasaat najoqqutaralugu saqqummiussaqaarsimapput, tassani takuneqarsinnaavoq siunnersuuteqartut kisiartaallutik akuersissutigisimagaat inatsisartuni ilaasortat sinneri itigartitsillutik.

Atassummiit motorcykeliliniq eqquseqqusaanginnerup atorunnaarsinneqarnissaanik aaliangiiffigisassaattut siunnersuuteqarsimavugut, tassani pingaarnertut anguniaratsigu aqqusinertigut angallannikkut pingaartumik isumannaallisakkamik ingerlanissaat eqqarsaatiginarmat.

Atassummiit soqutigisarivarput innuttaasut nammineerlutik toqqagassaqaartuarnissaat, taamaattumik eqquseqqusinninneq isumaqatiginagu. Atassummiit suna tamaat ammaffigaarput, kisiannili killilersuinikkut innuttaasut nammineq toqqaasinnaanerit killilersussanngikkippat isumaqarpunga, taamaattorli innuttaasut nammineerlutik akisussaaffigisagaat iliuusitik. Eqquseqqusiunnaarnernik tunngavilersuutaasimasooq eqqarsaatigalugu motorcykeliliniq ingerlatsisut mianersuaattumik ingerlaartarsimanerat, nunatsinni qamuterallammik ingerlaarsinnaaneq akuerisaavoq, taakkuali aamma motorcykelitulli sukkaasoorujussuarmik ingerlasinnaapput. Innuttaasunut ajornartorsiutaangitsumik qamuterallannik ingerlatsisoqarsinnaavoq, kisiannilu piffit marluusut allarlunnaapput. Qamuterallaat apisartukkut ingerlasinnaapput, taava motorcykelit aputeqanngitsumi aqqusinertigut ingerlasinnaallutik. Taamaattumik isumaqarpunga ajornartorsiutaasinnaangitsoq, kisiannili taamaattumik ingerlatsiniaraanni inatsisit sukateriffigineqarsinnaallutik. Eqqaasitsissutigisavara motorcykeliliniq ingerlatsiniaraanni inatsisit nunatsinni inatsisiliunneqarsimasut sukangasorujussuususaasut isumaqarfigigatsigit. Maluginiarneqarsinnaavortaaq motorcykeliliniq nunatsinni angallateqarsinnaaneq inerteqqutaangimmat, kisiannilu eqqussisinnaaneq taannaavoq aporfiusinnaasoq annerpaaq. Taamaattumik eqqarsaqqissaartariaqarpugut.

Oqallinnissamat siunnersuuteqartup aamma eqqaavaa 21-inik ukioqalereersimanissaq, tamannalu isumaqarpunga inuusuppallaarsinnaaneq tassunga tunngasumik taamaattumik uagut 25-inik ukioqarnissaa innersuukkusunneruarput. Qulaani allaqqasut toqqammaviummik oqaaseqaatigaagut tassuunatigut paasitikkumallugu suut ajoqqutaasinnaasut suullu iluaqutaasinnaasut taakkartoratsigit. Ilisimalluaratsigu ukiut tamangajaasa saqqummiuttaratsigit. Takornartaangilaq siunnersuutigineqartoq maani, ilisimalluarparpullu suut aporfilersuutigineqalersinnaaneri.

Aqqusinermi angallannikkut isumannaallisaaneq eqqarsaatigineqartillugu annertuumik isumannaallisaaneq pingaartutut isiguarparput, pissutigalugu toqqissisimasumik angallanneq inuiaqatigiinni inissisimatikkusukkatsigu. Isumannaallisaanikkut naammappat tamanna ajunngilluinnartumik ingerlatsisoqarsinnaalissaaq.

Taamatut oqaaseqarluta, uani qujavugut oqalliseqataagatta.